

■ COLUMNA

# Olimpia: Pertge che ils Vallesans gudognan

DA JOST FALETT

Cumenzà aveva la candidatura pulit persuadenta: Gieus olimpics fermamain decentral, collavuraziun cun plirs chantuns, Turitg sco host city, nagina infrastruttura temporara. Uschia era il punct il pli critic da la davosa candidatura resguardà. Oz guardi or auter.

Co decidessas vus, preziasas lecturas e preziasas lecturas da La Quotidiana, en piazza da Swiss Olympic, tranter las duas candidaturas svizras? Dad ina vart la candidatura «Sion 2026» cun in concept cler: la collavuraziun tranter ils quatter chantuns è reglada cun contracts, tant areguard ils lieus per las differentas disciplinas sco areguard las finanzas, e Sion è fixà sco host city. Da l'autra vart la candidatura «Grischun e partenaris», da la quala nus na savain betg anc tgi ch'èn ils partenaris e la host city n'è betg definida. In detagl? La host city sutscriva ils contracts cun l'IOC e surpiglia tut la responsabladad, era quella finanziaria. Quai vala er tenor l'agenda 2020 ed è fixà en il «host city contract – Bewerbungsverfahren 2024». E la pli gronda malsegirezza per Swiss Olympic: Ils promoturs da la candidatura



grischuna suttastritgan adina puspè che nus possian anc adina dir «na» tar la segunda votaziun dal 2018. Pertge duai Swiss Olympic ir en quel ristg? Bittar ord concorrenza «Sion 2026» cun in concept cler e gronda acceptanza – e ristgar dal 2018 in «na» dals Grischuns? I n'è – independentamain sch'ins è per u cunter la candidatura grischuna – betg da chapir pertge ch'ils politichers grischuns n'èn betg stads capavels da reglar quai ch'ils Vallesans han savì. Uschia avessan nus savì spargnar quels raps.

Tiers vegnan anc auters sbagls dals promoturs: Il dossier da la candidatura è vegnì publicità pir sut squitsch. Inacceptabla è er la dumonda dals promoturs a las vischnancas da gidar a financiar la campagna da votaziun cun noss da-

ners da taglia. Quai irritescha – er ils indecis.

Cler che oz mancan anc bleras infurmaziuns. Quai che nus savain dentant è che tar tut ils grands events n'èn las finanzas mai sut controlla. Quai han mussà ils organisaturs dal campinadi mundial a San Murezzan pir dacurt: Pucas emnas avant il campinadi han els stuì dumandar ina ulteriura garanzia da defizit, cun l'argument che la situaziun finanziaria s'haja pegiurada ils davos mais – fin tar ils Gieus olimpics 2026 vai diesch onns.

Ins na po betg adina dar la culpa als adversaris sch'ils gieus olimpics na vegnan betg en Grischun. Avant quatter onns vessi dà in «gea» a l'urna sche la regiun da Cuir e Flem/Laax fiss vegnida integrada enstagl da far infrastrukturas temporaras dad ina milliarda francs (quai è trais giadas il nov tunnel d'Alvra). Ed er ussa han ils promoturs fatg memia blers sbagls. Igl è da chapir sche Swiss Olympic sa decida l'avrigl per il concept cler dals Vallesans u per ina candidatura maschadada svizra – il concept «Grischun e partenaris» cun tantas malsegirezzas vegn Swiss Olympic strusch a resguardar.